

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA


IUNI 2024

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

OSI FEAGAIGA EFKS NAPIER, LAUMUA O AOTEAROA



AUE! UA MALILIU TOA..O LE TAUA.



Rev. Elder Fiatepa Fa'ae
1958-2024

Susuga FIATEPA FA'AE'E FT
EFKS North Shore, Pulega Waitemata



Afioga TU'AFOE AUSAGE NERIATT
Tiakono Toeaina, Matagaluega AANA

O LE FAASINO UPU

- (i). *O LE LAUGA.....2*
- (ii). *O LAU AFIOGA O LE SULU....3*
- (iii). *FEAU O LE ASO....5*
- (iv). *O LE PEROFETA MULIMULI....8*
- (v). *OSIGA FEAGAIGA, EFKS NAPIER...12*
- (vi). *O E UA FAI I LAGI FOLAUGA...13*
- (vii). *ATA O E UA MALILIU & PENISIONE..16*

O LE LAUGA

(I le Suafa o le Tamā, o le Alo & Agaga Paia)

Tusi Faitau: Faataoto 4: 20 – 27

Matua: *Faataoto 4:23 “Ia sili ona leoleoina o lou loto i le leoleoina o mea uma; auā e tupu mai ai le amio”.*

Manatu Autu: **FAAMAMĀ LOU LOTO**

Fai mai le mau a le au fai tofā, o fofoga po o mata o le tagata, o faamalama ia e mafai ona iloa ai mea o loo i le loto. A faanoanoa mata, o lona uiga, o loo i ai se mea o loo faalētonu pe mamafa foi i totonu o le loto. A mata ita le tagata pe mata faasiasia, o lona uiga o loo tiga le loto. A mata ‘ata’ata foi, ona tatou iloa lea, o loo fiafia le loto o le tagata. O foliga ma mata, o mea ia e fa’aalia lagona o loo i totonu o tatou loto, a o lagona ia e mafai ona tino mai e ala i o tatou uiga ma tatou amioga.

Atonu o le mafua’aga lea o le fautua ma le tima’i mai o le Poto o Solomona, “*Ia sili ona leoleoina o lou loto i le leoleoina o mea uma; auā e tupu mai ai le amio*”. Auā o le loto o le tagata, o le nofoaga lea o ituaiga o lagona eseese. O lagona lelei faapea foi ma lagona lē lelei. O le fautua mai la a le tupu o Solomona, ia mafai e le tagata ona pulea lona loto. Ia mafai e le tagata ona leoleo i lona loto. Aisea? Auā foi e ogaoga aafiaga e oo

i ai le tagata pe afai e pulea o ia e lona loto, atoa ai ma le matagofie o mea e faia e le loto o loo leoleoina lelei. I lenei talutalu fou o le soifuaga, ua le masino le mau metotia eseese e leoleo ai meatotino ma fanua. E pei la o pa uaea, o pa piliki ma pa maa. O meapu’eata e maua ai le au gaio ma le au talepe fale, o sailini, ma le anoano o auala a le au popoto e leo ai ina ia malu puipua meatotino. A fua la i le manatu o Solomona, e le tau faia ni pa piliki, ni pa uaea ma ni meapu’eata pe a leoleoina lelei o tatou loto. I se isi faaupuga, e lē tau si’oina le fanua i ni pa, e lē tau faatutūina ni meapu’eata i faleoloa ma faletupe pe a lelei ona pa piliki ma faapu’eata o tatou loto.

E lē faigata ona iloa le tagata o loo pule i lona loto, a e silisili ai ona faigofie ona iloa le tagata o loo pule ai lona loto. A ola faufau ma taulamalama, o lona uiga o le loto ua palapalā, o le loto foi ua leaga ma taetaepalaloa. Na o mea leaga lava ma mea mataga e aliali mai i le tagata o loo pule ai lona loto. Peitai o le tagata na te pulea lona loto, na o mea lelei lava e fiafia i ai, o uiga tausaaafia e fa’aali, atoa ai ma amioga faaleatua e ola ai. Aisea? Auā foi, e tumu i le loto lelei, e loto mamā, ma e loto i mea a le Atua.

O lenei vaiata, poo le a se mafana, maopoopo o se aiga, o se nuu, o se faapotopotoga a o se ekalesia, a e a oo ina sao Satani i o tatou loto a e tuli ese Iesu, o le mea moni, o le a matua’i fefulituaa’i ma fevaevae’i. Auā pau lava lea o le mea e sau ai le tiapolo, e talepe, fasioti, faaumatia ma faaleaga. A e mafua ona taunuu faufauga a le fili, ina ua lē lelei ona leo o tatou loto. E lē iloa gatā le tagata o loo malu puipua lona loto mai le tiapolo, e iloa i ona uiga tausaaafia ma le amioatua, a o le loto o loo pule ai Satani, o le loto lea e fiu e nanā a e aliali lava le vaivai. E leai, leai lava se mea tatou te mafaia, pe afai tatou te toilalo i lagona vaivai o tatou loto, a e afai tatou te faamalolosi ma finafinau, o le a faapena ona faamallosia o tatou loto. O le loto o le ogatotonu lea o le soifua auauna ma ola tautua o le tagata i le Atua. A malolosi o tatou loto, a lelei o tatou loto, a totoa o tatou loto, a faatuatua foi o tatou loto i le Atua, fai mai Iesu, e mafai ona tatou si’i le mauga ma ave i le sami. A e a vaivai ma pala’ai o tatou loto, e leai a se mea tatou te mafaia. E eseese o tatou valaauina ma meaalofa mai le Atua, peitai e ala e tasi le mauga i Olo, i lo tatou faia lea o le finagalo paia o le Atua. O tatou ua na

o ni auauna ma ni meafaigaluega. ‘Aua tatou te felotoleagaa’i, ‘aua tatou te fe’ino’inoa’i, ‘aua tatou te fetusitusilimaa’i, auā e leai se isi e atoatoa, e leai se isi e leai sana sala, ua na o le Atua lava. A ia o tatou galulue ma le faamaoni e tusa o tatou valaauina mai le Atua. Ia mautinoa, e lē faamasinoina le isi tagata i le vaivai po o le lelei o le isi tagata. Leai, e faamasino lava le tagata e tusa o lana sa lūlū. Auā o le a ni pine o ni a tatou galuega? Pe na o soligatulafono e lē iloa ma nanā? ‘Aua nei galo o loo sisila fofoga o le Atua. “*Ia sili ona leoleoina o lou loto i le leoleoina o mea uma; auā e tupu mai ai le amio*”.

A o la le aposetolo, o tatou tino, o le malumalu lea o le Atua ua i totonu ia te i tatou. O fua o le agaga (fruits of the spirit) e pei ona faamanatu le aposetolo o Paulo, o meapu’eata ma pa uamea malolosi ia e leo ai o tatou loto. O le alofa, faamaoni, agamalū, loto faamagalo, loto maulalo, o le faatuatua ma le anoanoa’i o mea lelei e lē faatulafonoina e leo ai o tatou loto. O mea ia na fetalai Iesu, “*8 Amuia e loto mamā; auā latou te iloa atu le Atua.*” *Mata.5.*

O le faaolataga na saunia e Keriso, o le loto na leo malu, na taunuu manumalo i le faaeaina ma lona toe soifua mamalu, o le loto sa tuutasi i lona Tamā, e pule ai. Tumau i le Atua lona viiga. AMENE

Saunia susuga Vaai Tua FS,

EFKS Lalomanu,

Matagaluega LOTOFAGALEPAALEIPATA

O LAU AFIOGA O **LE SULU LEA** **AISEĀ E TOFOTOFOINA AI?**

“*10 Auā na e su’esu’eina i matou, le Atua e; na e tofotofoina i matou, e pei o le ario ona tofotofoina.*” *Sala. 66.*

E i ai auala e tofotofoina ai maa taua. O le auro e susunu i le afi, ia liu suavai ma susunu ai otaota o filogia ai. O le ario e fa’aaogāina le maneta; pe afai e tosina malosi ma pipi’i le ario i le maneta, o lona uiga e lē o se ario moni, a o loo filogia i le u’amea. E i ai mafuaaga e tofotofoina ai i tatou e le Atua; e eseese foi auala na te tofotofoina ai

tagata taitoatasi. E i ai taimi tatou te fiu ai e fai mea lelei, a e tutupu mai pea puapuaga. Na teena e Iosefa faaosoosoga a le faletua o Potifara, ona o lona mata’u i le Atua ma lona faamaoni i lona matai o Potifara. A e na avea lona faamaoni ma auala na ia oo ai i le falepuipui. O le a se finagalo o le Atua i lea ituaiga faiga? O tofotofoga o Iosefa, ua avea ma nisi o auala faafasitepu e laa atu ai i luga i lona faaeaina. O le falepuipui na feiloa’i ai Iosefa ma nisi uso a pagota. Na ia fai atu i ai, “*15 na gaioia mai lava a’u ai le nuu o Eperu; ou te le’i faia foi iinei se mea e tasi e tatau ai ona latou tuuina a’u i le lua.*” *Kene.40.*

Atonu o loo faapena ou lagona i lenei vaitaimi, ua manatu o loo e lailoa e fai le mea tonu ma le mea lelei, a e tauia oe i puapuaga, ma peisea’i ua lē alofa mai le Atua amiotonu ia te oe. Peitai, o nisi na o ana fuafuaga faafasitepu e te laa atu ai i luga. “*24 E lē toe liliu le toasā tele o le ALII, seia faia e ia, seia faataunuuina foi e ia manatu o lona finagalo; tou te mafaufau i ai i aso amulī.*” *Iere.30.* E te fememea’i, peitai o loo silafia ma faatonutonu e le Atua, na te fa’aaogaina mea uma o loo tutupu i le taimi nei, e saunia ai oe e pei ona sa ia faia ia Iosefa. “*18 Ua latou faatiga i ona vae i le noanoaga; ua oo lava o ia i le uamea; 19 ua oo i le tau na taunuu ai lana afioga, o le afioga a le ALII na tofotofoa ai ia te ia.*” *Sala.105.*

E te manatua le taimi sa e feagai ai ma su’ega i aso o le a’oga? O su’ega sa pei o ni sauaga, e faatigaina ai lou mafaufau ma le loto, peitai afai e toe manatunatu i ai, ona iloa ai lea, o su’ega na sa saunia ai oe. Na ta’u mai e su’ega mea ua mafai ona e a’oa’oina. Ma o mea foi na sa mafai ai ona laa atu i le isi vasega i luga atu. Na fesoasoani atu ia e iloa atili ou malosiaga ma ou vaivaiga a o e tuputupu a’e. Fai mai le Fai Salamo, “*10 Auā na e su’esu’eina i matou, le ATUA e; na e tofotofoina i matou, e pei o le ario ona tofotofoina. 11 Na e aumaia i matou i le upega; na e tuuina mai mea mamafa i o matou tua. 12 Na e faati’eti’e tagata i o matou ulu; na matou savavali i le afi ma le vai; a ua e ta’ita’iina mai i matou i le nuu lafulemū.*” *Sala.66.* E fa’aaogā e le Atua tagata, o mea tiga, o faafitauli eseese ina ia tofotofoina ai oe. Aiseā? Ina ia na ta’ita’iina oe i le nofoaga lafulemū, o i ai le manuia, le tamaoiga ma le fiafia, le faaeaina ma le pule e tatau ai, e pei ona sa la faia mo Iosefa.

IA AMATA I MEA ITI.

“21 Le auaua lelei e, ma le faamaoni, ua e faamaoni i nai mea iti, ou te tofia oe e pule i mea e tele;”

O nai galuega alofa laiti ma mea lelei iti e te faia, atonu e lē amanaia e tagata, e oo foi ia te oe e te lē manatu mamafa i ai, peitai e silafia lelei e le Atua ma fiafia i ai lona finagalo. Ia fai ma faataitaiga le tala masani ia Iosefa. O mea na tutupu i lona aiga ma totonu o le aiga o Potifara, na ia oo atu ai i le falepuipui ma nofo sala ai mo le sefulumaletolu tausaga. Pe ana o aso nei, e mafai e Iosefa ona apili lana mataupu, totogi sana loa e finauina lona moliaga. Peita’i sa le’i manatu i ai Iosefa e tetee i lona faaiuga. Aemaise e lē o faamauina foi sona lagona ma se manatu faameo i le Atua, pe finau atu mo le amiotonu o le mea na faia ia te ia. Na pau le mea sa taula’i i ai le vaai a Iosefa, o le faamaoni i le tulaga ua oo i ai; na faatino ma faataunuu feau ma tiute o lona faasalaga, o feau faigofie ma nai mea iti, sa ia faia ma le usitai ma le faamaoni.

O totonu o le falepuipui na feiloai ai Iosefa ma isi pagota e toalua, o le sifi kuka ma le tautu uaina a Farao, na faasala e le tupu. Fai mai le tala, *“6 Ua ulufale atu Iosefa ia te i laua i le taeao, ua vaai atu i ai, faauta, ua la faanoanoa.” Kene.40.* A e le’i tofia Iosefa e le Atua na te pulea ma tausia le malo tele o Aikupito, na muamua ona maitauina e le Atua, le loto alofa, le agalelei ma le amanaia e Iosefa o nai nei uso, na fiafia e faasoa, fesoasoani ma saili fofō i o laua mafatiaga. O se tala masani lenei, na faamatala a laua miti ia Iosefa, ma faamatala ai e Iosefa uiga taitasi o a laua miti: o le sifi kuka e i’u ina faasalaina i le oti, a o le tautu uaina sili e toe faafoisia i lona tofi. O le tautu uaina lenei, ina ua saili se tasi e faamatalaina le miti a Farao, na ia faailoa atu Iosefa i le tupu, ma tatala mai ai Iosefa i fafo, seia oo ina tofia e Farao i le tofi palemia o le malo.

Ioe, e tāua tele i le Atua le loto alofa atu, le manatu agalelei atu i si tagata. Pe afai e te silasila atu ma silafia se mana’oga, ia e taumafai e tali atu i ai e faamalie i lona mana’o, pe afai e te mafaia ma gafatia. Pe afai o loo e miti i ni mea tetele, e ao

ona amata atu i nai mea iti, mea faigofie ma mea e masani ai. I lau galuega masani, i totonu o le aiga ma le ofisa, le a’oga ma le lotu, aemaise i totonu o nofoaga e pei ona sa i ai Iosefa, e faigata ona faatino ai le alofa, le faamaoni ma le onosa’i. Pe afai e tuuina atu se feau, ia faia ma le fiafia ma le faamaoni, tuu atoa i ai lou iloa ma le malosi, ona tauia lea o oe e le Atua. Faafofoga foi i le tau i o le faamaoni i mea iti, *“ou te tofia oe e pule i mea e tele; ina ulufale mai ia i le fiafia o lou ALII.”*

IASUIA & FAAFOISIA.

“3 Le Atua e, ia e faafoisia i matou, ma ia malamalama mai ou fofoga; ona faaolaina ai lea o i matou.” Sala.80.

O suiga, o se tasi o mea e faigata tele ona talia e le tagata. Ina ua foi atu le alii Italia o Christopher Columbus i Sepania i le 1492, ua uma lana malaga taamilo muamua i le Sami Atalani, na faafeiloa’i fiafia o ia ma avea o se toa logologoā i le malo, ona o le tele o atunuu ma lauelele fou i isi itu o le lalolagi na ia maua. Aemaise lava lona mauaina o le talitonuga fou, e lapotopoto le lalolagi. Peitai o le mea mata’utia, sa le’i talitonu i ai tagata; na tumau pea le talitonuga o ia auga tupulaga, e laugatasi le lalolagi. O le uma atu o ia auga tupulaga, a e fotua’i mai isi tupulaga fou, na faato’a talia ai i mafaufau o tagata, e lapotopoto le lalolagi e pei o le mau a le alii folau. O le umi lena e mafai ona oo i ai, faato’a sui mafaufau o tagata – o auga tupulaga! O tagata uma e mumusu tele e vave fai ni suiga. Leitioa faapea mai le tala mālie a le alii tusitala Amerika o Mark Twain, ‘Na o le pau le tagata e mana’o vave e sui, o le pepe ia vave sui lona napekini’ (tulou).

O suiga, o se tasi o faafitauli tele tatou te fetai’i. Aiseā e faapea ai? A o atina’e ma le laalaa pea i luma, e mana’omia ai suiga? E manaomia suiga ina ia tupu ma ia ola. E lē mafai ona tatou laa i luma, a e nonofo pea i le mea e tasi, ma saga taofiofi mamau i mea ua tuai ma ua uma le aogā. Na iloa e Tavita lona vaivaiga faalenatura, ma lona fefe i suiga, na ala ai ona ia tatalo i le tele o taimi, ina ia alofa le Atua, ia faafoisia ma ia fai suiga e tatau, e i’u ai i le faaolaina. Ua tusa lava lea ma le tatalo atu e faapea, *Le Alii e, ua ou mana’o i se suiga, a e ou te fefe i suiga, o lea ia e faia a’u ia naunau e fai suiga.* Tatou tatalo ai.

O FEAU O LE ASO

Tusi Faitau: 1 Timoteo :11-21. “20 Timoteo e, ia e tausi i le mea na tuuina atu ia te oe.”

Olaga faaso’o (Discipleship)

Ia silafia o mafaufauga faaleagaga o le Tusi Faitau Aso i le amataga o le masina talu ai, na saunia e le Tamaitai Tiakono, le afioga i le tamaitai Palemia o Samoa, le afioga Fiamē Naomi Mataafa, faatasi ai ma le faletua o le susuga i le Faifeau Foma’i Faia’oga Malua, le faletua ia Lemau Alesana Fosi Pala’amo. E feauaua’i Fiamē ma Lemau i le tapenaina o mafaufauga faaleagaga o aso taitasi (Fresh from the Word), ma o loo tamua le tamaitai tiakono EFKS Lotofaga. Fai mai a ia, na ia tuua Samoa mo a’oa’oga i Niu Sila i le 1969, faatoa 11 ona tausaga. Sa faapea foi lona tina, le afioga Lauulu Fetauimalemau Mataafa, na ia tuua foi lona aiga a o itiiti i le 1945 mo a’oga i Niu Sila. Ma e pei ona sa tusitusi atu le tua’ā o Fetau i te i latou ma nai ona tei i vaiaso taitasi, sa faapea foi ona fiafia si ona tina ia Fetau i tusitusi atu ia te ia. O nei tusi sa avatu i le meli, amata i vaa a lalo, faasolo atu ai i vaalele. O aso nei ua vave ona taunuu soo se ituaiga imeli, o tusitusiga ma fesootaiga i auala faatekonolosi.

Aisea na tusitusi atu ai le matua i lana fanau? O le tali, ina ia maua pea le fesootaiga vavalalata, ‘aua ne’i motusia le sootaga, e ui ina ua va i vasa. O le olaga faasoo, ia ‘aua ne’i motusia sootaga. E pei ona taumafai Paulo e tusitusi atu ia Timoteo, ina ia maua pea le fesootaiga vavalalata. O le faataoto i le vine ma ona la (Ioane 15), o loo a’oa’o ai Iesu i le uiga faasoo lenei – ia pipii pea ma fesootai le lālā i le vine, le faifeau talavou i le tamā toeaina, le aulotu i le Ekalesia faatina, le tagata faatuatua ia Iesu Keriso le puna o le ola ma manuia. E le gata i lena, a o tusi e taulogologo atu ai e le matua o tu’i le mulipapaga, mea o tutupu i le aiga ma le lotu i le atunuu pele, ia iloa e le lupe o i le vao ese. E faamanatu le soifuuga faaSamoa, o tu ma aga EFKS sa faafailele a’e ai,

ina ia tumau ai, ia tausi pea i ai. *Timoteo e, ia e tausi i le mea na tuuina atu ia te oe.* O le a le mea na tuuina ia Timoteo, ia na tausi faalelei i ai? O le Tala Lelei ia Iesu Keriso, tuutuu taliga tuutuu gutu mai le tasi tupulaga i le isi, e tuufaasolo le talaiga o le Tala Lelei. Ia le gata ina tausi i le soifuuga na vaai ma faalogo ai, tausi le faatuatua ia Iesu Keriso na tuuina atu ia te ia, a ia augofie foi e tuuina atu i isi, ia Efeso ma soo se tasi. Aua le taofia, aua le teua, a ia faasalalau ma faalauiloa, ia fai mona tiute tauave, i le upu ma le amio. Fai mai Paulo ia Korinito, *O a’u na ou maua mai le Alii le mea na ou tuuina atu ia te outou...* Upu o le faatonuga o le Talisuaga Paia a le Alii. O le meaalofa foaifua a le Atua, mai lona alofa tunoa, ua tatou maua fua, a e le o se tau pe na maua i se sailiga, se ma’ema’e o se tagata.

E le faigata ona tatou iloa le olaga faasoo o Timoteo, i lana amio ma lana tautua matavela i le ulua’i Ekalesia. E lē sesē foi pe a faapea se manatu, i le soifuuga faaso’o moni o le tiakono tamaitai palemia, e tusa ma lana tautua a o se sailiga malo mo le atunuu tainane le EFKS, o ia solisoli mulivae ai i le faata’ita’iga a ona tua’ā ua lagomau mai ti’asā, afioga Lauulu Fetauimalemau sa taitaifono Fono Aoa Tina Samoa, ma le ulua’i palemia o Samoa, afioga Fiamē Mataafa Faumuinā Mulinu’u II, na Taitaifono Fono Tele EFKS.

Tusi Faitau: 2 Timoteo 1:15 – 2:13.

Matua: “16 Ia alofa atu le Alii i le aiga o Oneseforo...”

Aiga o le Faatuatua (Families of Faith).

O malo ma Ekalesia e fausia i aiga. O Samoa ua fausia i Tama ma latou Aiga, Aiga foi ma latou Tama. O Ekalesia e fausia i matāfale ma aiga lotu. O le tele o aiga i lo tatou atunuu i aso nei ua fai a latou toefaatasiga ma lotu faamanatu (family reunion), e tausaga taitasi nisi, ta’i 2, 5 pe 10 tausaga foi nisi aiga, e feiloai ma potopoto faatasi. E fai sauniga lotu e vivii ma faamanū i le

Atua, folafola le Tala Lelei e fafaga ai le aiga ia laulelei agaga i Afioga Paia a le Atua, a e le'i faasaga ane e tali le pa'umū, le vaisū, le moa tunupa'u ma isi taumafa Samoa ua leva ona nofo tatali i ai i latou mai fafo. E tolaulau le tala faasolopito, le gafa ma talaaga o le aiga, i e na tupuga mai ai, i le tuufasolo mai lea tupulaga ma lea tupulaga. E aogā tele nei faatasiga e feiloa'i ma faamasani ai, aemaise i alo ma fanau ia silafia e le tasi le isi, e lavea'iina ai le toe feiloai i i'u o gafa e pei o lea upu. Aemaise ia taofiofi mamau pea measina faapelepele ma tofi o le aiga, faapea le tumau i le soifuaga faakerisiano, le soifua matata'u i le Atua, ia avea o se aiga faatuatua, a e lē o se aiga faapaupau ma faasalemausau. Auā e eseese lava aiga. E pei ona sa i ai i aso o le au aposetolo.

O loo ia ta'ua, a o i ai o ia i le falepuipui, na tuulafoa'i o ia e nisi uso, o tagata ma aiga kerisiano ma le Ekalesia, e pei o Fogelu ma Emoneke. Ua avea le i ai o le aposetolo i le toese, ua lagona ai lo latou masiasi, le ita ma inoino i le aposetolo ma le Tala Lelei. Peitai o loo ta'uleleia e le aposetolo le aiga o Oneseforo, le aiga sa alolofa, sa tausi ma asiasi atu, fesoasoani ma lagolago faamalosi'au ia te ia. Sa le'i faatasi foi pe faalua, a e na faamafanafana soo i le aposetolo mafatia. Sa le'i mā, a e na latou asiasi, ave taumafa ma lavalava mo Paulo a o i ai i le falepuipui. Ma o le aiga lea, e faamanuia i ai le Alii, *“auā na faia e outou i le tasi o e aupito itiiti o o'u uso nei, o a'u lea na outou faia i ai.”* Mataio 25:40.

O faapefea mai lou aiga? O se aiga faatuatua, a o le a le ituaiga faatuatua o i ai? E ono ta'ua le igoa o tatou aiga ona o se mea lelei ma le faatuatua alofa, e pei ona faamauina le igoa o le aiga o Oneseforo, ma Piseka ma Akula, Eupolo, Paute, Lino, Kalaotia ma le au uso uma lava, o aiga o le faatuatua? (4:19-22) A o le a sou manatu i le tele o nisi suafa maualuluga ma aiga lauiloa o loo fetaua'iina solo i luga o aga fesoatai i nei aso, ona o soliga tulafono, sauaga matagā ma faiga amioletonu? E tatalo ina ia mafai ona toe liuliu le tofa, ia toefuata'iina ma salamō ma faolaina, auā o le mea lea na maliu ai lo tatou Alii o Iesu, le Mesia mai le aiga o Tavita. Ia ia te Ia le viiga.

Tusi Faitau: 2 Timoteo 2:14-26

Matua: *“20 Ua le na o ipu auro ma ario ua i le fale tele, a o ipu laau ma omea; o isi ua ta'uleleia, a o isi ua ta'uleagaina.”*”

Vala'au e auauna i le Atua(Calling to serve God).

Ua lē o toe po malaē, o le faamoemoe maualuga na valaauina ai Timoteo, o Paulo ma le au aposetolo uma, ina ia auauna i le Atua, i le galuega fa'aaposetolo, faafaifeau tala'i, faamisionare. E o atu e fai nuu uma ma soo, a'oa'o ma papatiso tagata uma i le suafa o le Tama ma le Alo ma le Agaga Paia. O lo latou lea valaauina. O upu apoapo'a i a Paulo mo Timoteo, o loo faamamafa ai le auala e fai ai le galuega lea, ma faatino ai le valaauina lenei. O auala o le faatuatua, faamoemoe, faalagolago i le ta'ita'iga a le Atua a e lē o le poto ma le malamalama o le tagata, auala o le onosa'i lototele ma faamalosi a e lē o le faavaivai ma solomuli gofie, ia faamaoni ma tumau ai, a e 'aua le faitogafiti ma ui i auala pi'opi'o, ia filigā amiotonu ma tautala sa'o, e tusa ma afioga paia a le Atua. Ia faia foi ma le loto maulalo, agamalū ma ia fa'aaloalo, a e lē o le faasausili ma mitamita vale. O auala ia e auauna ai i le Atua.

O lona uiga, o le auauna i le Atua, e lē faasino i le ituaiga tofi poo le ituaiga galuega, pe faapea na o le faafaifeau, faamisionare ma faaaposetolo e faasino i ai. E leai. O le auauna i le Atua, o le auauna i auala faaleAtua, e pei ona faamamafa ma a'oa'o atu ai Paulo ia Timoteo. Pe afai e faatino tiute ma faiva i auala e finagalo ai le Atua, ona fiafia mai lea o Ia ia i tatou, ua mālīe la tatou tautua i Lana silafaga paia *“15 Ia e taumafai ia avea oe ma le ua fiafia mai i ai le Atua.”* O le auala lea e tutusa ai le galuega faafaifeau, ma le faifaatoaga, failafumanu, le faipisinisi, le matai tausi aiga, le malu o le malo sikulakī ma leoleo pō, o le faipule ma le foma'i, faia'oga ma le faaofisa i faletupe ma soo se ituaiga galuega. O valaauina uma e auauna i le Atua.

Mata o le isi lea uiga e faasino i ai ituaiga ipu eseese o i le fale tele – e i ai ipu auro ma ipu ario, a o loo i ai foi ipu laau ma ipu omea. E ui ina eseese faiva, eseese tofi, a e afai e faatino i le alofa, faamaoni, amiotonu ma auala uma faaleatua, ona tutusa uma ai lea o nei valaauina, o

auaunaga uma ua faia e tusa ma le finagalo paia o le Atua, ma ua viia ai o Ia. Peita'i afai e sesē le auala e faatino ai, ona ta'uleagaina lea. Ua a'oa'o mai foi le aposetolo, pe afai e lape le faatatau ma ta'uleagaina, e mafai ona toe faaleleia, e ala i le salamō. *"21 O lenei, ai se tasi e faamamā ia te ia ai nei mea ua ta'uleagaina, e fai o ia ma ipu e ta'uleleia, e faasaina, e aogā foi mo le Alii, ua saunia mo galuega lelei uma."*

Ou te āva ma fa'aaloalo tele, a e manatu e sili atu ona latalata i le Atua le auaunaga a le teufale ma le tunutū o le ofisa, e alofa, faamaoni ma usitai i le faatinoga o ona tiute faatauvaa, nai lo le pule ma ofisa sili e amioleaga, lē faamaoni i lana tautoga pe amiolētonu i ana faai'uga fai. Pe sili atu foi ona mālie i le Atua le tautua faamaoni a le tamaita'i tiakono ua oti lana tane, nai lo le faifeau po o le a'oa'o e eva i le vaiaso atoa a e lē saunia lelei lana lauga. O le a foi le maualuga o le tofi faipule i le palemene, a e afai e molimau le atunuu i le soli tulafono ma faatupu maseiga, ua lē o se auauna i le Atua, a ua fai ma pologa e tautua le tiapolo. O faapefea mai lou valaauina, lou soifua auauna i le Atua? Viia le Alii, pe afai o fiafia mai o Ia. *"20 O lo'u Atalii pele lena, ua ou fiafia lava ia te ia."* Amene.

Tusi Faitau: 2 Timoteo 4:1-8

Matua: *"6 Auā o a'u ua faamaligiina nei lo'u toto, ua lata ona po ou te alu ai. 7Ua ou tau le taua lelei, ua i'u ia te au le tausinioga, ua ou taofi ile faatuatua."*

Ui le 'ula o le galuega (Passing the mantle).

O le tauluga o le Fono Tele a le Ekalesia i tausaga taitasi, e ui ai le 'ula o le Taitaifono mai lē sa nofoia le nofoa, i le Sui Taitaifono o lē o le a se'ei ma tauaveina le tofi ma tiute faata'ita'ifono mo le isi tausaga faafonotele. O le tuuina aloaia atu lava lea o le mamalu ma le pule, o faamanuiaga uma ma alofaaga, aemaise le lagolago a le EFKS, mo le tofiga aupito maualuga o le Ekalesia. A o le aganuu mamalu foi lea a le atunuu, e ui le 'ula a le sa'o o le aiga, ina ua na silafia ua lata ona aso e alu ai, e ui le 'ula i le suli sa tautua faamaoni, ua ia tusiaa i ai na te tauaveina le suafa ma tausi measina a le aiga.

O le tauluga o le galuega a Mose ina ua lata ona oti o ia, na ia faamanuia atu ai i le fanauga a Isaraelu (Teute.33), aemaise le taule'ale'a o Iosua

sa vae ma lima i ai le perofeta. Ua ui le 'ula o le galuega, ia ave le nuu o le Atua i Kanana le tofi folafolaina. Ua tonu ai le upu a le atunuu, 'E au i le tauola, e au i le fagota'. O le mau a Teuteronome 34, *"9Ua tumu foi Iosua le atalii o Nuno i le agaga e poto ai; auā na faae'e atu e Mose ona lima i luga ia te ia."*

O le tulaga tāua i lenei faiga o le ui pe faae'e atu o le 'ula mai le tasi i le isi, o le mautinoa lea o le tagata o le a ui i ai. Le tagata ua agavaa e tusa ma lana tautua tuāvae matavela, auauna onosa'i usitai faamaoni. E leai se faiga taumatemate, ni auala fa'aalata, ni faiga faaitu'au ma sē tau i ai, pe fua i le tagata e tele ana mea, a o se faapolokiki foi. Auā e toatele ua faitogafiti i nei aso, e lē fia auauna, a e na o le faatalitali ma faamoemoe i le lelei o upu po o le tele o tupe, ma isi metotia e mailei mai ai le 'ula e tiu ma mamalu ai. E tasi le auala e ui ai i le pule, na o le tautua.

Ua tusi faamavae atu le aposetolo, ua ui lana 'ula, o ona tiute faaaposetolo molimau tautua mo le Alii o Iesu, e faa'ula ai le taule'ale'a mai Teipe ma Lusa. E lē gata foi ia Timoteo, a e o le ui lava lea o le 'ula i le au faatuatua uma, o e faitau i lenei Tusi ma isi tusi a le aposetolo mai Taso i le nofo a Ekalesia. Fai mai a ia, *"5A o oe, ia e faautauta i mea uma lava, ia e onosai i mea e tiga ai, ia e fai le galuega a lē folafola le Tala Lelei, ia e matuā faai'uina lau faiva."* O nisi nei o tifa ma fala o loo su'i ma mamanu ai le 'ula o le soifua tautua mo Keriso, o loo fia ui atu e le augatamā ua lata ona po e alu ai, i le isi auga tupulaga e fa'aauau le galuega tuufaasolo. *O a'u ua faamaligiina nei lo'u toto, ua lata ona po ou te alu ai. 7Ua ou tau le taua lelei, ua i'u ia te au le tausinioga, ua ou taofi ile faatuatua."*

Mo le tagata o le a ui atu i ai le 'ula, ia tautuanā le upu, 'aua le maua 'ula futifuti, a e a maua, ia aputiputi. O le 'ula e lē o se la'ei mo tifiga ma teuteuga faamatagofie o foliga, a ia matagofie le auaunaga; e aogā e faaeaea ai i tulaga mamalu ma le maualuga, a o le 'ula ia sili ai le tautua matavela, tautua toto e auauna mo le manuia o isi. *"45Auā foi o le Atalii o le Tagata na lē sau o ia ina ia auauna tagata ia te ia, a e peitai ia auauna o ia, ma foa'iina atu lona ola o le togiola mo tagata e toatele."* Mareko 10. Le soifua o lo tatou Alii, lea ua tatou tago ai i 'ula tepa i 'ula, ua lau i 'ula aso uma, i lona maliu ma lona toetu manumalo. Tumau atu Lona viiga e faavavau.

O LE PEROFETA MULIMULI

(O se tala faafagogo ua faaSamoaia mai le tusi, 'The Last Oracle', tusia e James Rollins)

11.35 afiafi
Piripiato, Ukuraine

“Ua maua e Amerika le teine o Sasa,” na fai atu ai Nikolao i lona ita a o ia laa atu i totonu o le potu moe. O lona ita na mafanafana ai lona tino i le malulu o le po. Na faato’ a la’ua foi mai se fiafia ma Elena i lo la’ua fale talimalo i fafo o le Sone Faasaina o Kerenopili, sa nonofo ai le toatele o malo fa’aaloaloga ma le au valaaulia, mo le sauniga e fai a taeao.

Na alu le ‘afa itula talu ai o talanoa i le telefoni, ina ia mautinoa le tulaga lelei o mea uma a e le’i malama le taeao. O se valaau i lona tina i le Uareni na ta’u mai ai se tala lē manuia i lana faalogo. O fesootaiga a lona tina i ana uo sa galulue i le KGB na ia maua ai tala e liki mai fafo o le ofisa o galuega faasu’esu’e i Uosigitone. Na vevesi solo le aai i le luasefulu itula talu ai, i le sailiga o se teineitiiti. E lē mailoa po o Sasa. Ona toe foi lava lea o mea uma i se filemu e pei o fai se maliu. E oo ia Iuri ua sãõ. O i la’ua uma ma lona tina, sa la iloa lelei le uiga o lenei mea.

Ua maua e se tasi le teine.

Ma na masalosalo Nikolao i le tagata na ia mauaina.

Na uu mau ona tamatamailima i se moto.

E lē taumateina o le vaega lava lea e tasi na faafiufiu ia te ia i Initia, na latou save’u i luga suesuega a Fomai Poleki, ma toe laga a’e se mea sa manatu Nikolao ua tanu faatasi ma le oti o le tamaloa. Ua uma ona taumafai muamua e taofi i latou, a e sa le’i manuia. A ua lelei foi.

Na ia maua se fesootaiga e tasi, e puupuu lava, i le mae’a ai o lona taumafai lē manuia.

E foliga mai o le vaega sa i Initia na latou latalata i le mea lilo sa nanā e Poleki mai le toatele o tagata.

O se mea ogaoga tele i le suesuega a le polofesa. O se mea e tãua faasino i tamaiti. A o le ā?

Na valaau atu Elena ma le naunauta’iga i lona leo. “O le a lau mea o le a fai i le teineitiiti o Sasa?” Na iloa lelei e Nikolao o tamaiti sa ola faatasi a’e, e vava lalata i latou. Na tasi a’e i latou i totonu o le Uareni, o tamaiti matutua sa avea ma matua i le au laiti. O Elena sa faapitoa lona fiafia ia Sasa ma lona tuagane.

Sa faapea foi ona tãua le toalua lena ia Nikolao. Na oso atu o ia i luga o le moega i lona popole ma lona ita.

Na faafuase’i lava ona lagona e Nikolao le tutui o atigilima ma’ama’ai o Elena i lona ogavae. Na tafetafe ifo le toto, a o pupula malosi atu Elena ia te ia.

O se i’uleo malosi na fai atu ai Elena, e leai se faafinauga, leai se fesiligia o le mea o mana’o ai. “Aua ne’i i ai se mea e tupu ia Sasa.”

Na atili ai ona tutui ona atigilima, ma tuuina atu ai le tiga oona i luga o le tamaloa.

Na faataiõ Nikolao ma folafola atu, “Ua i ai fuafuaga ua faagasolo nei. Pau le mea e manaomia nei –

O atigilima ua pei o ni fao tutu’i faamau, ma le tiga pei o afi.

“ – o se mea e faafesuia’i ai.”

11.45 afiafi
Punatapu, Initia.

A o pã pã faititili ma fe’emo uila na suluia ai le potu o le malumalu, na mulimuli atu Elisapeta ia Karai i le uili sakara lapo’ã i luga o le puipui. Na ia faamafola ai lona alofilima. Talu ona ia faataavili le tupe, na manino lava ua i ai se mea ua na maitauina.

A o leã?

Na fai atu Karai a o ia faataupupula a’e i luga. “Mai a’u su’esu’ega o filosofia Initia, o le ogatotonu o le uili sakara e masani ona i ai se mataitusi Sanisikarita, e fai ma faailoga o se tasi o malosiaga faaogatonugalēmū. Mulahara, le a’a sakara i le faavae o le ivitū. Manipura, i le itulagi o le pelekusi o le la. Anahata, o le fatu.” Na ia pulato’a i luga. “O le mea lenei o loo gaogao. E avanoa.”

“E tutusa ma luga o le tupe,” na fai atu tuulafoa’i ai Elisapeta, e lē malamalama po o fea tonu o aga’i i ai le mataupu.

“Lena tonu lava.” Sa ia Karai le tupe ma ua lafo atu nei ia Elisapeta. “A e tago la e filiki i luga. Afai e te pupula to’a faasasa’o i le ogatotonu o le uili sakara i le isi itu o le tupe, o le a le mea lena e taatia ai iina?”

Na feliliua'i solo e Elisapeta le tupe. O le ogatotonu o le malumalu sa taatia ai le mataitusi lapo'a o le epialona, i le tulaga tonu e pei ona i ai le ogatotonu o le sakara uili i le isi itu. "O le E," na ia memumemu ai.

"E tu i le itu faafeagai o le uili." Na liliu atu Karai ia Matesone. "E mafai ona ou fa'aaogaina lou tootoo?"

Na tuu atu e le polofesa le tootoo ma lona musu. Na laa i tua Karai, aapa atu i luga, ma tulei atu i le pito o le faataamilosaga ogatotonu o le mapu uliuli. Na tiga maso o lona lima, a o alu ese le faataamilosaga itiiti, o taavilivili i autafa o se ogatotonu tusa'o, e pei o se vaavā i totonu o se paipa.

"O se faitoto'a lilo," na fai atu ai Matesone i le te'i.

Na tālo atu Karai ia Koualasaki. "Ou te fia a'e i luga."

Na savali atu Koualasaki, punou ifo tootuli i le tasi tulivae, ma faafesootai ona tamatamailima. Na sitepu atu Karai tu i luga o lima o Koualasaki ma a'e maualuga se'ia oo ina mafai ona ia tago atu ma tulei ese faavātele le vaega matala o totoe o le fola. O le vaega pito i lalo o le faitotoa lilo sa tu ese mai le fola e sefulu futu. I le fesoasoani o le tulei a Koualasaki, sa sosolo atu ai Karai i le avanoa.

"E i ai le auala fasitepu!" na ia valaau ifo ai ina o lilo atu ona vae. "E tau i lalo! E ui atu i totonu o maoneone i tua nei!"

Sa le'i mafai ona toe faatali Elisapeta. Na ia laa atu ia Koualasaki. "Tago mai."

Na ia laa atu tu i le tulivae o le tamaloa, ae na ia tago ane ua faamaopo lona puimanava ma si'i a'e o ia i luga. Na tau 'e'ē teisi le tamaitai i lona te'i. E fai si malosi o le tagata. Na tago atu Elisapeta u'u le pito o le avanoa e faapaleni ai o ia ma autago pogisa ona vae e su'e se mea e tu ai a e se'i u'una'i a'e atili i luga.

"Suga, o lo'u isu lena," na oi atu ai Koualasaki. "Sori."

Na ia tago atu uu lona tapuvae ma faatu i luga o lona tau'au. Na ia tulei ma pa'ū atu ai i le vaega na totoe o le ala. Na ia maua atu Karai i lalo i sitepu, o loo faasusulu solo lana moli i puipui. Sa faatumulia puipui i teuteuga, sa fefilo'i ai mataitusi ma foliga eseese.

"O Harapana foi," na fai ane ai Elisapeta ma le vaivai, ma tu a'e i ona vae.

"A e vaai mai i le mea lea," o Karai lea. Na ia ki atu lana moli ma faasusulu i le itu faafeagai o le faitotoa maamora. O se mataitusi epialona tele o loo vane loloto i totonu o le maa.

Sa sa'o lava lana tau matemate.

Na tago ane Elisapeta i lana mea pu'eata ma pu'e ana ata, a o faatasi atu Rosauo ma Luka ia i la'ua, ua fufusi atili ai le nofoaga.

Na faalagolago atu Karai i fafo. "Dr. Matesone?" Na iloa atu e Elisapeta i le avanoa, le polofesa o solomuli atu i tua.

"O save'ugamoa nei e mo le tupulaga e laiti ifo ia te a'u," na ia fai ane ai, e manino ua lē lava, a o ia setusetu ma lona tootoo. "Tau lava ina ta'u mai ia te au le mea e maua i a outou sailiga."

"O le a ou faatali foi iinei," na faaopopo atu ai Api, o lona leo e malifa i le fefe nai lo le vaivai. Na maitauina e Elisapeta lona gatete a o latou faasolo latalata mai iinei.

Na valaau ifo Karai i lalo. "Koualasaki, faatali atu iinei. Ne'i te'i ua tupu se faalavelave ia matou."

"Ua fetui lena mo a'u," na tali atu ai Koualasaki. "Masalo ou te lē offi i le auala avanoa lena."

Na faa'ivi atu mata o Koualasaki ia Elisapeta. Na ia lue atu i ai lona ulu, o lapata'i filemu atu ai ina ia faaeteete o ia.

Na toe pā pā mai faititili, na lagonaina i totonu o papa.

"Tatou o," o Karai lea.

Na ia ta'ita'i lo latou auala i lana moli uila. Na mulimuli atu ai Elisapeta, sosoo atu ai Rosauo ma Luka. Na faasosolo e Elisapeta ona lima i luga o le puipui. O tusitusiga Harapana sa soloatoa ifo i luga o le sitepu. O le gagana anamua sa le'i mafai ona faaliliuina, e mafuli lava ona sa le'i tele ni tusitusiga na sao mai. Na tau saili pea le au su'esu'e 'eli fanua ma 'eli tino o tagata, mo le maa Roseta mo lenei gagana, mo se faasinoala e mafai ai ona tata'e la latou gagana lenei mai anamua.

Na autilo solo Elisapeta i ona autafa. Masalo o le maa lena lea e iinei.

O lona maofa, le segia o lona mauili ma le fiafia tele, na tātā tetele ai lona fatu i lona fatafata. Na ofo o ia i le lē mafai ona lagona atu e se isi le tātā.

I le taimi lava lea, na ia vaia ai lona tamā o ia uia nei laasaga uma. Na ia vaia lona fatu sa tātā tetele e pei foi o ia nei. I lea taimi na ia lagonaina

ai se mafutaga sili ona uiga ese le vavalalata ma lona tamā, o se lagona sa le'i maua muamua lava i lona olaga. Ma e lē toe maua foi. Na mapuni teisi lona fa'a'ā, a o fetuleni solo mai nei lagona i totonu ia te ia.

E lē umi se ala sitepu ma sa gata mai i se tama'i potu, na motu ese mai le maa oneone. Na lagona atu le gugulu a'e o le vai mai le isi itu. O se vai faalenatura na oso mai i se pu e maualuga faatulivae, i luga o le puipui ma tafe atu i se ta'e o le fola, ma alu ese atu ai i fafo.

“O se ana vai'eli Harapana,” na fai atu ai Elisapeta, ua na iloa atu le faatulagaga. “O le nonofo i auvai o le Vaitafe Initusi, na ola a'e ai tagata e popoto e faasūsū.”

Na faasusulu solo e Karai lana moli. O se mea sa leaga le faataamilosaga. Na tipia ai i totonu o puipui se isi uili sakara. Peitai o lona ogatotonu sa le'i gaogao. Na taatia ai se maa tele foliga pei se fuāmoa.

“O se kopi o le omafalosi,” na fai ane ai Elisapeta. O ia ma le isi vaega na latou tosina i ai. Na tu mai o lona maualuga e gata i le puimanava, ma o lona lapo'a e faaluaina le maa sa i le fale mataaga i Teli. O le pito i fafo o le faaofuofu faasaga i lalo, sa vaneina ai ni ata o laau ma laulaau.

Na folofologatā e Elisapeta ma pulato'a i ona autafa. “E i ai le tagata na ia toe fausia le ulua'i atituma, le potu aupito tutotonu o le malumalu o le Perofeta, le nofoaga e fai ai ana perofetaga.”

Na laa atu Elisapeta agai i se nofoa apamemea sa taatia ai. E tolu ni ona vae. “Le vaetolu lea. O le nofoa aloaia e afio ai le Perofeta.”

“Po o perofeta.” O Karai lea a o ia savali ese mai. Na ia ki atu lana moli i isi nofoa taatitia solo.

E lima le aofai.

Na pu'e solo ata a Elisapeta. O le a lenei nofoaga? O le a lana mea o fai iinei?

Na valaau mai Rosauro mai le puipui, a o ia faamaulu ma faafafa lana ato. “Atonu e te fia vaai i le mea lea,” na ia fai atu ai.

Na tu mamao mai Luka i le isi itu. Sa faasino lona lima i luga i le tualuga, a e sa le'i pa'i i ai. E ui lava ina pogisa i ataata, a e na iloa lelei atu e Elisapeta le gatete o ona lima.

Na savali atu Elisapeta ia Rosauro. O se ata gaosia i nutiga tioata, toetiiti uliuli pato'i i le leva, na ufiufi ai le puipui. E tele ni fola na paepae solo, ua toulu ese. E i ai se tasi na ia soloia ese i

lalo vaega o le ata gaosi, ua soloi ese ai seneturi o limu ma palapala. E foliga na fai faanatinati. Na vaaia e Elisapeta lona tamā o ia soloia i se 'ie'ie le galuega a le tufuga, i le tau sailiga pe se a le mea o i lalo ifo.

Na ia faatau pupula atu i le mea na faailoa mai.

Mai le fola agai atu i le tualuga, na faailoa mai ai le vagaia o se malumalu i luga o mauga. “Paranasusi,” na memumemu ai Elisapeta. “I le osofaiga a Roma. O loo fa'aalia ai le Toilalo o le Malumalu o Talefaia.”

O le isi vaega na faailoa ai se potu, e le pei o lea na latou i ai, e ui ina sa i ai se omofalosi i lona ogatotonu – a o le maa na faailoa mai i se tulaga faakolosi. O loo natia ai i lalo o lona faaofuofu, se teineitiiti o faapupu'u ai, na afisi i lima o se tina talavou, faapupu'u faatasi a o saili e fitafita Roma.

Na tepa atu Elisapeta i le maa sa i ona tua. E lē tataua ona...Na ia laa atu i luga o le puipui. O le isi vaega na faailoa mai ai ni taavale o solofanua, asini, ma taavale toso. I le pito i luma o le taavale, na taitai atu ai e le tina talavou lava lea le teine itiiti. O le solo taavale umi na a'e atu ma sopo atu i mauga. O le taavale mulimuli na tulei atu e solofanua afi e lua, e manino o loo fai ma sui o solofanua na tuleia le taavale solofanua afi a Apolo i le vanimonimo. Peitai latou te le o tosoa le la iinei. I tua o le taavale toso, o loo taatia ai le maa e tasi lava lea na ia puipuia le fafine ma le teine itiiti. O le omofalosi o Talefaia.

Na liliu Elisapeta ma faasaga atu i le maa sa i ona tua. Na gatete ato o ia. “E lē o se kopi le mea lena,” na ia fai atu ai ma le gatete. “O le ulua'i omafalosi lena. Le mea o loo faamauina i tala faasolopito na tusia e Pulutake ma Sokerate.” “Ma vaai mai foi i le mea lea,” na fai atu ai Rosauro.

Na ia tago ane toso atu Elisapeta i le isi vaaiga. O se ata o le vanu, o se vaaiga fiafia o tagata Eleni o fausia malumalu i luga o papa aliali mai ma tautau mai i autafa o le vanu. Na iloa atu foi le potu aupito tutotonu o le malumalu, peitai ua lē na o le toatasi le Perofeta o nofo i luga o le tafatolu, a ua to'alima. Na latou faataamilo i le omafalosi, sa pupusa a'e pei se maugamū mai le pu i le pito i luga. O le asu na fausia ai foliga o se tamaitiiti o ona lima o loo faalalava. O ona mata o afi mumū, ma afi sa fe'a'e ai a'e mai ona alofilima matala.

Pe mata o le tama sa faasino tonu i perofetaga lautele, po o se isi mea patino faapitoa?

Po o le a lava, a e na maua e Elisapeta mata pupula afi o le tama o loo faatau pupula sa’o atu ia te ia.

I autafa o ona tau’au, sa tu ai Karai o loo faasolo foi lana vaai ma maitau i le tala o tusia mai ata gaosi. Na ia tālo atu lona lima aga’i i le puipui, e aofia atoa ai le tala.

“O le Perofeta mulimuli, le tama itiiti, mata sa mou ese pei se agaga ina ua uma le toilalo ma faaleagaina le malumalu. Sa faalilolilo ona sosola ese leoleo malumalu o Eleni mai sauaga a Roma, ma latou aumau ai iinei, na latou toe fausia ai lo latou nuu i nofoaga malepelepe nei o Harapana, ma lalafi ai.”

Na manatua e Elisapeta le tala a Api faasino i le nofoaga lenei. “Na latou nonofo saogalemu ai mo le fitu selau tausaga, atonu ua fenofoa’i faalilolilo ai ma tagatanuu o le laueleele. O le mavae o le tele o augatupulaga, na miti’ia lēmū atu ai le faaEleni i totonu o le aganuu faalnitia.”

“Ona latou ola a’e lea i se olaga faasagatau i sauaga faalelotu ma le tuputupu a’e o le aganuu faailoga tagata a Initia,” na fai atu ai Karai.

“O ponaivi uma. O se fasiotiga tagata na tupu iinei.”

Na tautala mai Luka i le pito e gata ai le puipui. “A e na latou toe sosola foi,” o lana tala lea.

Na latou faatasi atu ia te ia. Na tu mai o ia na o se sitepu mai le vai taavili. O le ata iinei e le o faia faamosaika, a e na vali faanatinati e se tagata. Na vali i se vali uliuli, o faailoa ai le osofaiga o malumalu. Na sosola solo tagata i soo se itu, peitai se tasi vaega o tagata, na faailoa manino i valivali pupula, na sosola i ni solo o taavale e uumi ma uili lapopo’a. Na mōu mālie atu agai i le puipui, ma aga’i atu ai i se mea mamao.

Na tuu malie atu e Luka ona tamatamailima i luga o le solo a taavale. Na tata’e mai lona leo faatasi ma lagona. “O matou tagata nei,” o lana tala lea. “O Romani. O iinei na matou o mai ai. O lo matou tupuaga lenei.”

Na toe liliu i tua Karai. Na ia faatau pupula i le puipui, o ona foliga ua meia.

O leoleo Eleni na sosola ma le tamaitiiti mulimuli ma le omofalosi, ma lalafi i totonu o le vanu lenei, ma mitiia ai i totonu o tu ma aganuu Initia i totonu o le fitu senituri, ona toe faasaga ane lea o le aganuu lava lena e tasi, ua toe

faasauāina i latou ma tutuli ese ai ma taapeape solo ai, a ua i lalo o le igoa fou.

Kipisi.

Na tālo atu e Karai lona lima e aofia uma ai le puipui. “O le tala o loo faailoa mai iinei e tatau ona mulimulita’ia ai se laina faakenera tuufaasolo sa faasao ma puipuia malu i le tala faasolopito. Na tafea mai Eleni, sau iinei, toe alu atu i fafo. O se laina faakenera o le paoa ma le malosi faasavana, le atamai faasavana.”

“O le mea lea matou te feoa’i ma ta’avao ai,” o le tala lea a Luka a o ia pupula pea i le solo a taavale. “E pei ona fai mai le tamaloa Initū, e leai se nofoaga e saogalemu e faavavau. O le ala lea o lo matou feoa’i pea, taumafai e puipui le mea lilo o loo taofi mau i totonu o fatu o matou tagata.”

“Seia oo ina gaoia le mea lilo mai ia te outou,” o Karai lea.

“O se mea lilo e tala lona talaaga i tuā lava ia Talefaia,” na faaopopo mai ai Elisapeta. Na ia fa’aata le tamaitiiti i Uosigitone. Pe mata o ia o se suli moni o le Perofeta Mulimuli o Talefaia? Na laa atu Rosauo ma faasino i laina o isi tagata na sosola mai le sauaga i isi itulagi. “O tagata sosola sulufa’i nei,” na ia fai atu ai ia Elisapeta. “O i latou nei na mafua ai ona maua e lou tamā talaaga o kenera ma i’u mai ai iinei, ma ala ai ona faaputupu iinei ia maka e faailoa ai, aemaise lava i le vaega o tagata aupito maualalo le tulaga. I le mea na miti’ia ai le au sulufai i totonu o le nuu o tagata.”

A o la’ua talanoa, na toe alu atu Karai agai i le puipui, ma toe iloilo lelei ata ma faailoga taitasi. Na tau mai i le mosaika mulimuli, i le tama sa pupula mai i afi. “E i ai le tusitusiga lea e i lalo iinei,” na ia fai mai ai.

Na faalatalata atu i ai Elisapeta. E tolu laina sa i ai. O le laina aupito i luga o se laina aulelei faaHarapana, o le isi laina e faaSanasekeriti, ma le mulimuli e faaEleni. O lalo ifo o nei laina sa i ai se isi uili sakara. “Ou te lē mafai ona faitau faailoga faaHarapana,” o lana tala lea. “E leai se isi na te mafaia. Ma lalo ifo, na o nai upu amata o le faaSanasekeriti ma le faaEleni ou te iloa. O isi faailoga e tele ua tafia ese. A o upu e mafai ona ou faitauina e faapea, ‘o le lalolagi o le a susunuina...’” Na ia pu’e ni ata, aemaise lava i le tamaitiiti ma le afi.

(soso’o atu i le Sulu Samoa Iuni 2024)

OSIGA FEAGAIGA, EFKS NAPIER, NIU SILA

O le sauniga o le Osiga Feagaiga a le EFKS Napier i Niu Sila ma lo latou Faafeagaiga susuga Richard Lealofi FS ma le faletua ia Tauese Lealofi, na faataunuaina i le Aso Toonai 22 Iuni. Na ta'ita'iina le sauniga ma osia le feagaiga e le susuga i le Toeaina ia Aufaga Faafia FT (Faafeagaiga EFKS Cannons Creek, Toeaina Pulega Ueligitone i Matu, Komiti Faatonu Matagaluega LAUMUA O AOTEAROA). O le faitauina o Afioga Paia a le Atua ma le Lauga na saunia e le susuga Kuateman Palaita Ulutui FS (faafeagaiga EFKS Ketesemane). O le sauniga na faatumulia i le paia faaleEkalesia ma le mamalu faaleatunuu aemaise o aiganalua. Na auai sui o le Laulau o le Fono Tele, le Sui Taitaifono toe filifilia, susuga Esera Auatama Esera FS ma le faletua ia Tamara Esera, faapea le afioga i le Teutupe toe filifilia ia Melepone Isara FS.

Na muamua molimau le sui o le Aulotu, le A'oa'o Fesoasoani afioga Masame, e tusa ma le latou faiga filifiliga, sa faalagolago lava i le fesoasoani mai o le Agaga Paia e lima ta'ita'iina ai le tofa ma le faautaga a le Ekalesia, ma autasi ai i le susuga Lealofi ma le Faletua. Ona tali fuaitau lea ma molimau le susuga i le Faifeau, e tusa ma lo la'ua talia o le valaau fa'aaloalo atu a le Ekalesia i Napier. Na faaleoina foi le faafetai o le faifeau ma le faletua i le Aulotu e tusa ma lo latou finagalo ua valaaulia ai i la'ua fai mo latou faifeau. Na faafetaia foi le tapuaiga a matua ma aiga, tainane le Ekalesia lautele i le nofo tatalo mo ana tama fanau tuuina atu mo le Tala Lelei. Na tau fai folafola foi e le Aulotu ma le Faifeau, o le a latou galulue faatasi mo le manuia o le galuega a le Atua, ma le viiga o Lona suafa.

Na folasia le 'IE o le Feagaiga e tusa ma la tatou aganuu pele, e pine faamau ai lenei feagaiga ua osia i luma o le Atua, a o molimau le Ekalesia. Ona valaaulia lea o i latou e fai ma sui, e faatalofa ma faamanuia i le susuga i le faafeagaiga ma le faletua. Na muamua tula'i le afioga Tamamasui Aotearoa fai ma sui o le aiga o le faifeau. O le susuga Esera Auatama Esera FS na fai ma sui o le EFKS Sapapalii, le Pulega Safotulafai ma le Matagaluega Faasaleleaga, tainane le EFKS Aoao. O le susuga Vaimoso Apineru FS, le Faifeau Penisione o le Aulotu, o ia na fai ma sui o Tama ma Tina, o le aufaigaluega

Toeaina ma Faifeau Penisione o le Aulotu, le Pulega ma le Matagaluega atoa, e faamanuia i le atalii ma le uso o le a amata le la'ua galuega. O le susuga Vaigafa Paleono FS, o le faafeagaiga EFKS Vaovai, na fai ma sui o le nuu o le susuga Richard ma le EFKS Vaovai, faapea le Pulega Falealili o afio ai le afioga i le Taitaifono Fono Tele ia Tunumoso Soliola Iosia FT. O le susuga Leiofi Upu FS o loo galulue i le EFKS Mango Hill, Pulega Perisipeni Matu, Matagaluega Kuiniselani, sa fai ma sui o le latou Vasega 2020 i Malua. O le susuga Periti Oka Fauolo FS, o le Failautusi o le Matagaluega Laumua o Aotearoa, na fai ma sui o le Matagaluega, na ia faafeiloa'i fialia le uso faifeau ma lona faletua, ma na fa'aaogaina foi lea avanoa e faailoa ai i le susuga i le faafeagaiga ma lona faletua nisi o tulaga taua o le galuega o le a latou pulupululima faatasi ai i totonu o le laumua o Niu Sila. O le afioga ia Lea'ana na fai ma sui o le aiga o le faletua ia Tauese ma le afioaga i Saanapu mai Safata.

O le Lauga e pei ona sa saunia e le susuga Kuateman Ulutui FS, na autu i le manatu, **IA O ATU E FAI (GO AND MAKE)**. Na faaopoopo foi le Upu faamalosi'au a le Taitai o le Sauniga, na ia faamamafa ai mo le faifeau ma lona faletua, ina ia galulue fialia. O le loto fialia ma le mafaufau fialia, o le meaalofa a le Atua mo Lana aufaigaluega e faigofie ai, e māmā ma sologa lelei ai le faatinoga o feau, tainane le solo lelei o fesootaiga ma le va nonofo ai ma isi. Na ia faailoa foi le faataatiaga o le latou Pulega i le nofo a Aulotu i ona vaega e tolu, e pei o le Tafatolu i le Laumua - Leulumoega, Lomitusi, ma Malua.

Na taualuga i le sauniga paia o le Faamanatuga, na ta'ita'iina e le susuga Richard. O se vaega taua lea o sauniga faapitoa o tapuaiga a le EFKS, e pei o ana faifeau o auauna o le Upu ma Sakarameta. Mulimuli ane ona fai lea o osiga taulaga i le Atua, e ala i tausamiga felanua'i ma fa'aaloaloga maualuluga masani faaSamoa, na faafaō i ai aao o le EFKS Napier ma aiganalua, mo le Laulau o le Fono Tele, le Taitai o le Sauniga ma le Pulega, le aufaigaluega a le Atua ma le mamalu na auai e molimauina le taeao fou o le EFKS Napier, ma le auga o aute o lea aso. Ia faamanuia tele le Atua i le galuega.

O E UA FAI I LAGI LE FOLAUGA

FOAILALO MAFINA TAIULU

PAIA'AUA

5/4/1932-13/3/2024 (91+11+9)

PUNUA MISA TAIOAANA

SALETELE

3/6/1953 – 8/5/2024 (70+11+6)

“30 O le matagofie o le pepelo lea, o le mea faatauvaava le lalelei, a o le fafine ua mata'u i le ALII, e viia lava o ia.” Faataoto 31.

O Foailalo o le faletua o le tiakono o le EFKS Letui, Pulega Gagaiformauga o le Matagaluega Itu o Tane. Na soifua mai i le Aso Lua, 5 Aperila 1932 i Letui, a e na faamanavaina ana galuega i le Aso Lulu, 13 Mati 2024. Ua 91 tausaga, 11 masina ma le 9 aso le matua o le soifua. Na faaipoipo atu ia Taiulu Paia'aua mai le afioaga o Matava'i Safune, ma e 139 ē na tutupu mai ai i le tinā. O Foailalo o se tinā agamalū ma loto alofa, e tausi faifeau ma e loto atu i le galuega a le Atua, e ui ua faataotolia ona ua o'o i le tauafiafi o le soifua matua, a e na te iloa lelei le faifeau. O se tinā sa naunau e faamaopopo lana fanau e o'o lava i lona aiga. Sa taulamua i le mafutaga tinā.

O lona sauniga faamavae na faia i le malumalu EFKS Letui. O a'u na ta'ita'iina, sa feagai ma faifeau o le faletolu le tapuaiga, o le faifeau EFKS Fagae, le susuga Afatia Niue (FS) sa feagai ma talosaga, o a'u sa faitauina le Tusi Paia ma le molimau o le tinā, a o le failautusi o le Pulega le Susuga Panapa Too FS o le EFKS Sasina sa laugaina le upu faamafanafana. Na molimau Paia'aua Afioga Taiulu e fai ma sui o le fanau, a o Masu Lafovale sa molimau e fai ma sui o le aiga e faailo le auunaga a le tinā i le aiga. Na molimau foi nisi o le fanau faapea nisi o lona tauaiga. Na faaiu i lona oliolisaga tumau i lona maota i Faletui ma faatofa atu ai i le tinā i le pese faamavae a le Au Kerisiano, *“Talofa uso e, tofaina oe”*. Ia manuia lau malaga Foailalo. O lenei ua teuina mo oe le pale o le amiotonu, e foa'iina mai ia te oe i lea lava aso e le ALII le faamasino amiotonu, e lē gata foi ia te oe, a o i latou uma o ē fiafia i lona fa'aali mai.

Saunia susuga Mathew Simati FS

EFKS Letui,

Matagaluega ITU O TANE.

O le Afioga i le Tiakono ia Misa ma lona aiga, o se tasi o Matafale faavae o le Aulotu a Vaivasetai i le tausaga 1967, lea e o'o mai lava i le taimi nei, o loo auuana ai lava ma lona aiga. O Misa na faaekalesia i le aso 7 Ianuari 1968 e tusa ai ma faamaumauga o le api o le galuega, a e na faaetitia lo la tofi Tiakono ma le tina ia Li'o Leilani i le aso 29 Novema 2017.

O Misa o se tasi o sui faavae o le Mafutaga Tamā, ina ua faavaeina lenei mafutaga ia Aokuso 2023. O ia foi sa avea o se sui matua o le Aufaipese mo nai tausaga, aemaise ai o le 2018 na faafiafia ai le Aufaipese i le 13 Aso o le Kerisimasi a le EFKS Vaitele Uta. O se tamā e tele ana taleni ma ona agavaa, o ia o se palama, o se kamuta, o ia foi o se inisinia taavale. O le tamā ia Misa ma lana au kamuta na fausia le pa atoa o loo siomia ai le lotoā ma le fanua o le Aulotu, o ia foi ma lana au kamuta, sa fausia le Falea'oga o la matou A'oga Amata. O lona uiga, e tele lona sao i le atina'eina o le itu i fafo o le feau ma le galuega, ua faamāmā avega foi i le Aulotu, ona o se tau pa'ū ma le faamāmā avega, na ia ofoina mai ai lana tautua, na te faatinoina ai nei galuega tetele. O se tagata e tausi Faifeau toe toaga i le lotu o le Aso Sa, o se tagata e fiafia lava e tautū i Sauniga o Faamanatuga, ma faatino isi vaega o le sauniga e pei o le Faitauina o le Tusi Paia, faapea foi ma Talosaga, aemaise o le aoina o sene o lotu uma, i le masina e tautū ai. O Misa e toatolu i ai i latou sa faau'uina i le sauniga faapitoa mo Penisione a le matou Aulotu ia Tesema i le tausaga 2023, ina ua aulia tausaga e 70. Sa maua lona Tusi Pasi, o lana faasolo, faatasi ai ma le Hamper ma le meaalofa tupe e \$200. O le faamoemoe o lea sauniga i tausaga taitasi, ia amanaia ma aloaia le auunaga a soo se tasi o le Aulotu, ua aulia le 70 tausaga o le soifua. O se Tamā e finau ma lona gasegase, lea foi na saili togafiti ai i Niu Sila mo se taimi umi. E tiga ona gasegase, a e molimauina sa mana'o lava e faatino lana auunaga o le fale inisinia, i le taimi na toe foi mai ai le siiga ma'i.

O ona toe sauniga na faia i le 10.00am, Aso Toonai 18 Me 2024, i le malumalu a lana Ekalesia EFKS i Vaivase-Tai, a o feagai ai le Ekalesia Aoao ma lana Fono Tele. O le Susuga ia Ailani Tanielu (FS) na faaulufaleina lona sa, o le faitauina o le Tusi Paia sa fofogaina e Faatoia Malele (AF), a o talosaga sa faaleoina e le Susuga ia Malotau Lafolafoga (FS). Sa molimau lona Faletua ia Li' o Leilani i le mafutaga ma le tamā, a o a'u sa ta'ita'i ma saunia lona molimau faaleagaga faapea ma le feau faamafanafana. Sa filifilia ai le Sapakuka 3:18 e fai ma matua, *"18 A e peita'i a'u, ou te olioli lava i le ALII, ou te fiafia lava i le Atua o lo'u faaolataga."* (yet I will rejoice in the Lord! I will be joyful in the God of my salvation) A o le 'au'au o mafaufauga faaleagaga - O le faamoemoe ua maua. (The Hope that is found).

O le faalototele i lea aso, po o a lava faigata, po o a lava tiga, po o a lava puapuaga e feagai ma lo tatou ola, 'aua nei manatu ua tuulafoaiina i tatou. A ia tumau ma maua'a lo tatou faatuatua ma le loto talitonu i le Atua, o le faamoemoe lena ua tatou maua. O le faamoemoe e maua ai le malosi, maua ai le mafanafana, e maua ai le lototele, e feagai ai ma taimi faigata o la tatou malaga faalefaatuatua. Afai ua tatou mafatia, ootia ma vaivai, tatou te malolosi i le alofa tunoa o le Atua, e ala ia Iesu Keriso ma le galuega a le Agaga Paia. O le faamoemoe lena e maua i totonu o lo tatou faanoanoa, tatou te lototetele ai, tatou te mafanafana ai, e maua ai foi lo tatou mautinoa. O le a le mautinoa?

Ioe, o le oti, e lē o se mutaaga lea o le tatou mafutaga ma le tamā ia Misa, o loo i ai le ola fou i tua atu o le oti, ua saunia e Keriso mo ona tagata faatuatua, tatou te toe mafuta ai ma le tamā. Pei lava ona tautino le Aposetolo o nuu ese, (2 Korinito 5) *"8 Ua matou lototetele ma ua sili lo matou mana'o, ia o ese i matou i le tino, a ia nonofo i matou ma le ALII."* Na mae'a ona toe sauniga, ona lagomau lea i lona oliolisaga tumau i lona maota ma lona aiga i Vaivase-Tai. Manuia lau malaga Punua Misa Taioaana Saletetele.

Saunia susuga Seilala Seilala FS
EFKS Vaivase-Tai
Matagaluega VAIMAUGA

TI'A SILIOMANŪ PENIAMINA
TAUATI
20/8/1958 – 31/5/2024 (65+9+12)

O la Iesu, *"Ai se fia mulimuli mai ia te a'u, ia faafiti o ia ia te ia, ma ave e ia lona satauro, i le mulimuli mai ia te A'u. Auā ai se fia faasaogalemuina lona ola, e maumau ai ia te ia; a o lē faamaumau lona ola ona o a'u ma le talalelei, e faasaoina e ia"*

Na soifua mai le Afioga i le Tiakono, i le Aso Lulu 20 Aokuso 1958. Na valaau lona Atua, a o galue pea o ia i le Ofisa, i le Faletupe Tutotonu o Samoa, i le Aso Faraile 31 Me i le tausaga 2024 a o le'i manava galuega a le Malō i le afiafi. O ona matua ua failagi le folauga, sa galulue ma avea ma faifeau Metotisi. Na faasuafaina o ia iā Peniamina, e faatatau i le igoa o le Misionare, po o le faifeau Metotisi papalagi e igoa ia Benjamin. Na faaiipoipo atu i le tinā ia Tutai Salilo Tolovaa Siimoo, i le tausaga 1980, ma e to'alu o la'ua alo; o le susuga ia Sili Desmond Tauati, ma le tamaita'i e suafa ia Elizabeth Patisepa, ma ua fai uma o la'ua aiga. O lo'o faamauina i le api o le galuega ma le Pulega, na mua'i avea le faletua iā Tutai Salilo ma tiakono, i le tausaga e 2008, ona mulia'i se'ei mai lea o le afioga ia Sili, e tauave le tofi Tiakono, e tusa ma le taliaina i le Pulega ma le Ekalesia, i le aso 28 Ianuari i le tausaga e 2013, ina ua manatu o ia, e liliu mai i le tatou Ekalesia, mai le Ekalesia Metotisi i Matafele, a e tauave faatasi le galuega ma le tinā, ina ia atia'e si o tatou Ekalesia to'agaogao i Fugalei, i lalo o le ta'ita'iga a le Susuga i le Faafeagaiga ia Maselino Sului FS ua tu'umalō.

E osia la matou feagaiga ma le Ekalesia i le tausaga e 2018, i le aso 30 o le masina o Aokuso, e le'i leva na lotu mai lena tamā. E ui fo'i e le'i leva na mafuta ma le faifeau, faatoā 5 tausaga ma le 8 masina, a o la matou matau, peiseai ua 30 tausaga, talu o auauna ma tautua i Fugalei; auā e tusa lava tausaga e afe, ma le aso e tasi. O le uiga o le tala, o lona loto atoa o le galuega ma le Talalelei a Keriso. O le auauna e taulamua, ma fai ma faata'ita'iga i mea lelei. E toaga i tapuaiga, i le Au Leoleo i vaveao, aemaise so'o se sauniga fa'aleEkalesia, e o'o lava i Tofiga fa'aletiakono, i le lufilufiina o le Fa'amanatuga

O le tamā ua masani ma le soifua faitaulaga, masani le ola e avea ma taulaga, e le gata i le amio ma le olaga faakerisiano, a o galuega fo'i, e atagia ai lava le amio ma le galue e tatau mo le tiakono, le a'oa'o, ma le tagata o le Ekalesia; pei o upu a le atunu'u, e iloga lava le tamalii i ana aga, e iloga lava tagata o le Alii. O se auauna e faamaoni i lana tautinoga fa'atiakono. E masani ona fa'alogo fa'afitifiti, o lea e ola ma soifua i le lalolagi, e lē o le lagi. Peita'i e ola ma le mautinoa le auauna, o mea e fusifusia, ma le ola faamaumau mo Keriso i le olaga nei, e fusifusia foi i le lagi. E tu'umalo nei Ti'a, o lo'o avea pea o ia ma Sui Taitaifono a le Ekalesia. Sa avea foi o ia ma Teuolua a le Ekalesia mo tausaga e 4, talu ona taunuu mai. Na faamavae mai lona tofi teutupe, ina ua manatu e faaseetuāgalu, a e tofia ane isi sui a le Ekalesia, e tauave lenei tiute taua. A e talu ona avea ma teutupe, e fa'aigoaina, o le lufilufi lima lelei, e tapa atu, o lo'o lava ma totoe seleni fa'aleoleo, mo ni saoga a le Pulega, fa'apea galuega a le Ekalesia. O le tele foi o taimi i le matau, ua faatino lava galuega a le Ekalesia, i ana lava seleni, e na te lē ta'ua ia tulaga, a ua leva ona nofo ilo ai le Ekalesia. E talu fo'i ona tula'i mai i le tofiga teutupe, e le'i fa'aletonu le fa'amaopoopoina ma le teuina o tupe a le Ekalesia, e fa'atuatua ma faamaoni. I le ma le isi, pe a fua i lana galuega fa'atausi Tusi ma Suetusi, e fua le paleni i le tupe sau, a e 'aua ma le ma'umau. A ua leai ni mea gau i lana auaunaga i le Galuega a le Atua.

E faagalo gatā i ona uiga, auā e lē soona sii le vaa po o le leo o le auauna; vaganā ua moomia, ona faato'a si'i lea. E fa'aaloologia lona finagalo ma lana tofa i le Ekalesia, a e peitai, e lē fai a'i i sona finagalo toatasi, e mulimuli, e taotao lava ona manatu, i se manatu fa'atauvaa a le faifeau ma le lautele o tagata o le Ekalesia; a o lona naunautaiga, ia fai le mea lelei, ma le mea sili mo le Atua; ia matamau i le Atua, ma ia manatua, a lē manuia i le taimi nei, e manuia ai le tupulaga 3 ma le 4. O isi fa'amatalaga e fa'apea, fai lava le galuega e tusa ma le ta'ita'iga a le Agaga o le Alii. O ia o se taiulu i lana galuega ma le Ofisa, o i ai le poto ma le tomai e faia ai fa'ai'uga. O ia o se matai Sa'o i lona aiga. A o le pule e auauna ma tautua, o le pule e mafai ona mulimuli, i lalo o le ta'ita'iga a o matou auauna fa'atauvaa i le Ekalesia. E ui ina lē auga le faatauvaa ma le matua

o lona soifua, a e ese ma le fa'aaloalo i le faifeau; na te amanaia ma alofa foi i so'o se tagata, matua pe laititi, tusa lava po'o le a le tulaga, lea fo'i na molimau lautele ai lana Ofisa.

O ona Sauniga ma lana Ofisa na galue ai, sa faia i le falemalu o Sefo i Ulumootoutua, i le Aso Sa 9 Iuni. Na ta'ita'i le tasi faauluuluga o se tasi vaega i le Faletupe Tutotonu, le A'oa'o Fesoasoani susuga Taupa'u Tuutatau Mika Leo, a o le afioga i le Minisita o Tupe, Hon. Lautimuia Ueese Afoa Vaai na ta'ita'iina le faasologa o molimau a le aufaigaluega. O ona Sauniga faale-āiga, sa faia i le Aso Gafua 10 Iuni, i le falemalu lava o Sefo; na ta'ita'iina e le susuga Sesera Tolovaa FS, o le tuagane o le faletua ia Tutai Salilo.

O ona toe Sauniga, sa faia lea i le falesā a lana Ekalesia EFKS Fugalei, i le aso Lulu 12 Iuni. Sa faaulufale lona sā e le Susuga i le faafeagaiga ia Siaosi Salesulu FS. O talosaga na saunia e le Susuga i le A'oa'o Fesoasoani ia Fa'amoetaulua Joe Latū. O le faitauina o le Tusi Paia, sa fofogaina e le Susuga i le A'oa'o Fesoasoani ia Mulitalo Howard Fidow. Na molimau le tuafafine ia Sugalu Chan Check e fai ma sui o tuafafine ma uso o Ti'a. Na molimau le Kovana o le Faletupe Tutotonu e fai ma Sui o le Ofisa ma le Malo, e faafetaia ai le auaunaga a lenei tamā i tausaga e tele, amata mai le Faletupe Bank of Western Samoa, le Falemeli se'ia oo mai i le Faletupe Tutotonu o Samoa. O le susuga Letaulau Pesaleli FS na molimau fai ma sui o le aiga potopoto. O le faletua ia Tutai Salilo Tauati na molimau e fai ma Sui o le fanau ma le aiga. Ona taualuga lea i le molimau a lana feagaiga, le susuga Komisi Samuelu FS, faapea ma le Upu faamafanafana. Na maea le Sauniga, ona molimoli atu lea o lona Sa, i lona oliolisaga tumau i Alafua ma lagomau ai. O lana faifeau ia Komisi sa fai ma ta'ita'i. Fa'afetai tautua! Fa'amalo Galue! E le Galo oe! Viia le Atua. O la a Iesu "*Ai se fia mulimuli mai ia te a'u, ia faafiti o ia ia te ia, ma ave e ia lona satauro, i le mulimuli mai ia te A'u. Auā ai se fia faasaogalemuina lona ola, e maumau ai ia te ia; a o lē faamaumau lona ola ona o a'u ma le talalelei, e faasaoina e ia*"

Saunia susuga Komisi Samuelu FS,
EFKS Fugalei,
Matagaluega APIA.

ATA O E UA FAI LAGI




FOAILALO MAFINA TAIULU

ATA AU PENISIONE 2024



VAIGALO MAUA FT & PETIMARA



**TI'A SILIOMANU PENIAMINA
TAUATI**



SUSUGAALESANA FS & FAASASALU



PUNUA MISA T. SALETELE



IAKINA ALEFAIO FS & ROINA